



Minggu, 10 Januari 2021
Ogen: 2 Korinti 5:17



Si Mbaru



Kata-kata tahun lalu adalah bahasa tahun lalu, dan kata-kata tahun depan masih menunggu suara lain (T.S Elliot).
Enda sada kalimat si nuduhkan litna perubahen tahun si enggo lewat ras tahun si mbaru. Kai sibelasken ras sidahiken bas tahun si lepas e kerina enggo dung. Adi si ulihi ka kin pe bas tahun si mbaru e gelarna enggo mbaru. Jadi, mereken sada motivasi banta, maka kai pe ateta si belasken ukuri lebe, mehuli entah lang adi ibelasken, kai positif ras negatifna. Adi enggo ibelasken e lanai terulih, e enggo sikerajangen simegi-megi. Perlu pentar i bas nehken kata.

Sendalanan ras si e, Paulus pe ngerana kerna si mbaru, eme tinepa Dibata si ersada ras Kristus. Uga kin kataken tinepa si ersada ras Kristus? 1. Lit i bas ia biak Kristus; meteruk ukur, ermediate, nggit erkorban ras patuh man BapaNa seh mateNa. 2. Ipehaga ras ihamatina temanna la erndobahen. Sehkenna keleng ate alu nggit nampati. 2. Tadingkenna perbahanen si male, cikurak, cian, pernembek, erelem-elem, judi, rubat, nggit ndabuhkan teman, egois, ras sidebanna. 3. ivaluasina kerina pengerana, perukuren ras perbahanenna. I bas si kurang akapna payona, nggit ia mpekenasa, gelah lanai terulih bas wari si reh. Si jadi gegehna ndalani si mbaru e eme ersada ras Kristus.

Ersada ningen e ku ja sada ku je duana, teridah sada teridah duana. Bagi selemba duit dua gambarna, labo terpesirang. bage min kita ersada ras Jesus e, la terpesirang. Adi bage teridah min Jesus e i bas perukurenta, i bas pengerana ras pendahinta, i bas sikap geluh, i bas jabunta. Adi ersada ras Jesus e, tiap wari lit si man pekenan i bas dirinta. Labo Jesus si robah gelah seri ras kita tapi kita si robah gelah seri ras Jesus. Bagi nina Paulus reh sempurnana bagi Kristus. Tupung lit si man pekenan ras nggit kita mpekenasa, em kataken si mbaru. E maka perlu lalap lit si mbaru i bas dirinta, tambah lalap si mehulina i bas kerina dampar geluh.

Nggeluh bas tahun si mbaru mahan bana krina kita nggit lalap ipelimbarui, seh dungna mehuli, mehuli, mehuli bagi Kristus!

